

朱太復文集

朱太復文集卷之二十三

五湖朱長春太復著

序

贈鹿門茅先生年伯壽八十序

昔歲癸未余同茅薦卿舉進士薦卿既第立抗表請
告還省是時茅先生春秋高七十有二矣甚善如壯
人薦卿自以生未經離膝恂目有懼年之心頗得且
委組以侍几杖余等高其義不得慰解余時為文送
之勸其出事先生以樂志歸果不為先生歡先生果

甚善也尋替起家令章丘六年超拜殿中御史康
寅余從服舍公除赴京師會薦卿於仗下薦卿又
告余而謀歸余為誦來時謁先生而善如昨薦卿弗
肯信願獨請讓余往日聽子成乃公志事亦多天幸
今又離七八年齒益高即善吾無更幻志而難鏹榮
乎生假物也阿翁明年政八十矣誠願得奉一觴盤
辟嬉侍翁於棟水之涯子無再口余又微告之先生
似有道殆古仙人愈益恠宕弗信乃曰子為暱也若
見其外不見其內以為識至人乎為子者固有不得

已仰日月而焦然余習於方言熟先生而覘其神以卜壽如探策也請明季為厯行事序之文以佐子觴而辭夫茅先生天下才士也余後不睹先生壯時則吾父博士公游先生門下長頗能言其氣亢直立功名忤宰相三以致落位此世中士大夫盡知弗庸言抑壯者不足觀人語曰歲寒然後知松柏之後彫也故烏獲之勇扛鼎行年八十而求人扶持騏驥之衰不逮駑馬老年末路精銷神頓故人道移易進退之交也夫非有方習道莫能定之今記余蒙幼初省事

歐先生東歸未久以迄今垂三十季矣行小變者三而先生栩栩然恒服也不變也先生兒率而無態言情而無華行徑而無岐禮直而無苛動靜如風如波出其天機而無心葆真而滅文合於古而駢於今合者自合駢者自駢先生不知也初十年以其曾出奇畫助胡中丞破倭夷揚功名於海上故中丞及其歸禮以上賓好如同產當是時為開說民隱陰助中丞以宣化訖其鄉甚多先生治行文章聲甚盛郡縣吏奉之甚嚴先生泊如既而有苛節小夫媒孽搆先生

於所賦借先生以為銘流口訛翕夫盛名蓋人所難
居也當官者有退而持之十年之餘兩被不訾初欲
毀先生不能既乃及其長子讒鑠之毒骨肉之痛憂
疑之間聖人於此有跋胡矣中人則慙之下人周章
溺之而先生又泊如乃今天道還復先迺後合薦卿
且仕矣仕又顯先生名故不湮蓋章心故益小杜門
也削牒也書板也市道紛紛人所不甘而先生又泊
如凡十年一變三十季三變變而能持猶其曰難况
其觀化冥通若燕雀蟬蛸之過於前也非有道能之

乎夫人易喜耶則神浮易怒耶則神躁浮傷冲躁傷
恬不冲不恬是故損生其喜怒旦移而無宰於中外
氣因乘而崇之草木之蓬蒿初生披風而莠然其哀
也望白霜而先萎根之不回也故曰松柏獨也正冬
夏青青惟正定神惟神泊如泊如而仙矣先生不殆
於仙哉或曰請徵之仙者澹先生多財仙者靜先生
善文章仙者遁世先生父子貴盛故有好實多思樂
軒冕而得仙乎夫猶不累神乎曰水者死地也溺人
及於頸半升入口充腹則不救若觴深之沒者溺而

隨齊三曰三夜而出猶沐也故乘舟以避水中法也
為其不善沒者上士若汙中士若出若入下士若蠲
其蠲有不蠲於中乃避若逃因緣者思議者分別者
皆畛域也非其至者故道氏曰大白若辱西方之人
曰不垢不淨且人之言仙有方宗者不過老子老子
生熟不盡於前而積歛無涯非為富乎西過關著三
牛言其家等於六經非有文乎祖者不過黃帝黃帝
戴冕黃屋而為天子世有貴盛過于天子者乎吾所
言者神子所言者事如以事已矣則金樓玉堂九轉

三彭婉女黃童制尸蛻骨之方事不經見君子所不
道也吾所言者神而合道有據以誦先生慰薦卿曰
尚可以出乎吾不言其恠

贈封公空谷曾先生壽八十序

今上萬曆十八年庚寅余奉命補令陽信縣縣附
北海古齊北邊竟聞其邑至今多古風為愜然既至
未下車問名德人倫若干人又高年若干人下車問
士大夫之賢幾在仕矣其仕而予還家者誰也父老
功曹吏民首以空谷曾先生齒垂八十有陰行其子

侍御史公告於

天子而歸奉先生驩余聞而高之立命引車謁先生之廬則久杜門樂生匿不欲束帶見令長已得見於御史公溫溫而知先生恭人薦行也益冬鄉飲酒學官弟子導余奉

天子功令賓延於其家又弗出則弟子為道其行至高口甚詳竊比於古之衡門鑿坏之標益欣然想慕庶幾其明年則先生正壽八十矣學官伍常振張思敬王憲章弟子劉學初李如檜孫鳳翔等褒衣之徒

廢至又告余將往觴之願微一言致酒且曰學校之
設有三物尊年上賢錫孝所以表風厲俗而范士之
型也魯先生上得壽於天矣窮經五十季蓬累棲遲
天損七十年德不究於天下而表於里名不昭於其
身而發於其子少壯植義既耄不倦居約而恬貴而
不驕莫然抱其神明粲然飲太和以與造物者樂餘
中得德於其身御史進而弘業於朝義既著矣名
既揚矣又退而侍先生於東郊之圃邀樂於天娛斯
百季下得孝於其子三物備可以風乎則學士第子

之幸也余拜而應曰此有司之幸也不敏敢不唯唯
雖然豈非天乎今士大夫俸名褒爵顯功勞於世甚
著世亦鵠應而稱之然豈必天生才而盡貴貴而盡
賢其窮阨中谷堵室繩樞歌白駒而矢弗諼汶汶以
死無聲不勝數即為農隱市託技埋名都有淳懿上
行過於士者或豐德而畜才或才矣而終不遇不遇
矣而又無令嗣及有嗣而載世困或後黷而不得見
見而不得享此皆非天乎昔漢之世弓旌不絕於朝
傳駕不絕於國三老得舉行功曹得薦賢郡邑太守

令長得疏士士都出與漆而步囂廊脫夫須而曳長
裾當此之時有德者庸無德者晦不論老少轅公伏
生皆介齊之先民也或徵或隱要以弘經扶義興教
成俗自是以後士非以文進則牖下老萌隸耳俗里
方以詬病而笑之故士雖塞淵名德非假以世資不
顯也然此豈非天乎人力何至於此故昔者顯士表
俗之權操之主上後世主不用而操之於天天福善
人而禍不善所以示民勸也雖其才有僭十得其半
足以賊心而助化其黷當身者身勞之其黷於國者

父勸之子厲之故曰兄為將而弟關弓隣子仕而黑
誦經今余信在厭次千乘之間倪公東方生以下士
幾不振矣土僻學孤人閑而溺予欲戶張一弦不能
祝化若曾先生者意天所詭權以風余士乎故觀於
其父而可樹德也觀於其子而可勉功也觀於其父
子相與樂成而可知食德之契也余為令及先生已
老矣又無疏士之權又數請不得見又高其行與御
史公之德孝乃稽首而頌天曰天所福者其有量乎
天將託權以永其化也抑余士實觀以勸豈獨三物

蓋有六善焉六甲子數也以此致酒上壽曰頎先生
再周一甲子以風吾黨幸幸有司志幸幸

賀封尚寶卿巽洲沈年伯壽序

客問朱生曰太廟之縣千歲崇牙蝕而鍾完何也曰
剛者壽也河涘之楊蛀剝其中松榦亭亭老如龍何
也曰貞者壽也上林之儲材液構數丈車關曰運不
敝何也曰勞者壽也然則廣成之宵宵諄耶彼何基
乎搖精而勞形曰然伯陽曰綿綿若存用之不勤無
搖無勞曷用哉車關之運以人引之動休之止曰馳

百舍而關不得主其所勞者非勞之者也故不救李
父猾猾走而爭曰乃仆耳客曰嘻子知養生乎家大
人春秋七十矣性樸直好任義自負與人嚴峭無文
容見人過嘗目攝折之可謂至剛出言無訾動足無
躓持引正義福祐不回雖蓬累而居鄉鄉人士近數
十里踴然稟化也可謂至貞自兒時好讀古文辭一
過輒成誦至今殆盡天下籍矣而吟嘽不置遇客則
為詩古今言亶亶家常口授子伯孫環侍幾二十人
開說入今夜或曙不言息自督家政秋毫經畫其間

小大皆能有分甘慳其意作苦無敢惰自以壯為名
弟子不得薦起欲以治畧行之家且寄志吾等吾等
長分室而大人尚提衡於中年暮不自惜吾獨以此
憂其勞過也子謂勞壽子知養生乎曰吾嘗望見子
大人矣目晶晶若營四海而神恬而氣漠其人幾所
謂為而不勤脩然行地絕跡真人哉若然者壽雖然
子聞消息說乎東野稷御馬百圍不止而敗馬非不
可圍勞之太甚減十圍節其力馬可日試而無病養
生者亦若此矣故曰水不動則平鬱閉而不流亦不

能清子無謂子大人毋勞而息勞是務乎剛貞之士
其性宜動拂性不祥客蹕然喜曰善哉養生乃所聞
吐納經紳制刑誠幻無用猶一呖也請為著言將以
壽大人遂書為序客為同榜進士沈性甫其大人吳
中所稱宿儒吳洲先生今致政尚寶卿沈以安其家
子也

壽溫上舍五十序

蓋富積之士役利文詞之士博名性命之士羸壽三
等者烏可同日語哉故傳曰求名者於朝求利者於

市若求壽者於山林決澦之間耳夫逐時心計富而
上壽者無半拔藻雕龍高名而上壽無什四三此豈
天性哉彼皆有意為者不得則敝形搖精滑天和以
身殉故使恬靜道引去世之流得啖口笑之矣夫人
生而資用欲饒形體欲便心欲通文章已老而欲壽
焉今有匹夫告之曰嗇而年予而千金高而名則匹
夫不受恐其以珠彈而為挈圖者咲然使草野高年
之人食茹蘆被半褐目不知一二不別東西塊然獨
以委蛻稿立於世則豈非人兒而禽生哉無為貴壽

矣故莊生曰至富國爵并焉至顯名譽并焉老子曰
上德不德下德執德執德者始立門戶屏嗜欲苦形
性招異於天下至人亦過而笑之故有曰聖人不居
山林昔者鷦夷子居陶三致千金富人也而老為列
仙東方曼倩博學善屬文仕漢為郎儻流也而說者
或稱歲星遇道云今溫先生年五十面童然髮鬢然
骨稜稜然是非道之符而年壽所出哉顧其家自先
世積居不貲先生又守業息之遂首郡中素封稚時
咄咄以茂才起聲入補太學壯而文益工數竒不得

通藉也夫世中心計雕龍之士若彼溫先生壽若此
則山林素隱詘焉先生為人木訥持大節不為俛仰
而逡逡有退讓風居家力本而文守禁游騶而熾畜
閉施蓋亦恥之每郡中大徭若議貸皆首赴義而賢
豪士時時或得其賴至其為文辭率祖夷簡薄鈎棘
一宗於自然夫富者不逐何勞乎形文士不詭何搖
乎精不搖不勞乃可長生豈老莊所稱至富上德者
耶且早暮固人之遇也賈秀才弱冠奮跡而公孫弘
五十餘年而就徵士之通顯何常溫先生既富有壽

而獨文辭未售或有待哉

贈費隱人序

隱人者隱於吳市郡中高門大豪無不友也性好飲
多使酒為任數自喜一郡不能下氣後與朱生交善
稍稍和伏之折節習為儀然其氣卒歿嘗自許古俠
客也今年隱人且四十矣朱生一日告郡中諸客請
有為隱人壽郡客皆灑然謂朱生第倬詭安有四十
而壽者朱生笑曰唯唯請有說已朱生中議他去郡
客稍稍復相與謀朱生故好奇作此度外事為湯乎

姑從試之抑隱人有氣辭將不堪乃畧二三十人會
朱生歸來言請如議以期日具牛酒請朱生後為壽
耳朱生又笑曰不不請有說客不憚去至日則果治
牛奉酒羣來邀朱生為前謝朱生乃又笑與俱至隱
人所隱人且纍纍衣大布坐階携二子為嬉郡客旅
入隱人驚却郡客進牛酒把之坐以齒前為壽申祝
詞隱人愀然目朱生朱生立從傍笑次且及客曰朱
生前朱生曰唯唯客曰朱生壽朱生曰不不是曰會
客無不頊頊若失也有前數朱生曰何居此非而主

議乎朱生洋洋浮觴進曰客無恠請有說某聞記稱
四十強仕而仲尼誠無聞故君子得時則駕不得時
脩節而流譽隱而顯蓋人生少未定老而墮故兩者
于及此時岌岌哉人而頑冥習亡賴為市井豪或阿
邑合汙風波之民是道棄矣隱人儻所謂陸沈不得
時者非乎其慕義任氣又自喜故某願比贈言期諸
公壽諸公初却我已又要我欲為如等壽我故曰唯
唯不不故知諸公怒我問也我將以至道為隱人規
耳諸客氣始定有更進曰吾等都慕隱人高氣來為

友隱人俠蓋吳中隱人名吳中莫不聞隱人未四十
業如此惡有孔氏所云而朱生為何規自賣哉詢朱
生倬詭也朱生頓首謝曰有之夫道一陰一陽庶類
含生二氣代序元化久長故壯士伉與夫溺兩者皆
過行也子不見理絃乎緩則弱而無聲高張促柱急
而聲雄然難為矣宛之良鐵冶沸而柔之沈而淬之
削為刃利斷釐甲頑而不化魯不及鉛刀之用也隱
人則慕義誠然亡其陽勝與夫所聞至人者巍然不
搖泊然不撓雌雄龍蛇與道俛仰故能隨世轉化名

壽久長與日月齊行今隱人割乎若矩崖乎若峙頗
乎不可恩劇乎若不容雖以扶義而畧行之所侵常
出於不意大豪賢長者故為游名引下之時時亦未
釋若其小黠陰中行賊徃徃恨不刺於腹受敵不少
也此非剛之過而為俠難耶外拂人肉刻神不有人
道則有陰陽之患詩曰剛亦不如柔亦不吐老子曰
知其雄守其雌為天下谿隱人或未達此義乎天下
之水注於谿渚不恩挹不竭與天地齊名等壽可也
故曰上善如水下愚如火言未卒隱人慨然起謝曰

善哉吾聞生言得養生焉可窮幸無夭吾受子賜矣
於是朱生引觴而酌酌觴而進曰隱人聞樂山之說
乎山至剛也剛者壽請以山為壽隱人聞舌存之說
乎舌至柔也柔者壽請以舌為壽隱人自今勉哉朱
生上酒拜隱人酌酒亦拜會客後齊拜起乃更相唱
咏樂之以朱生首事命為引隱人曰即以志也遂為
序

鵝陽娛老後序

昔在周漢之間何世多危行隱君子與余讀衡門

樂之詩可嘆焉恠其名多不傳然想其人寬適棲遲
必有葆光曷壽之樂他散見子傳往往有仙舉忘幸
以為奇及玄晏所志畸人陸沉之士詳矣上者或至
百十餘歲次者不減耄期皆優哉以享過歷學士大
夫美談之夫養外者期名養內者期壽兩家分途而
馳當諸君子淙伏刻意之年夜行之德不顯據津之
士然且咲為抱只尺之義區區稿焦無用至於德邵
齒高丘穴幽光聲達如鼓鍾天下慕義萬世不朽通
顯榮名願滅焉乃後知儻寄朝菌不如棲隱者之兼

也子言之歸乎君子隱而顯自漢以後都人士卑薄
隱行倬詭之客大半雜與農夫庸宦偕老亦無好奇
招隱之家為之傳志其殊猶絕跡者代無數人揚其
名深可惜焉每欲遠拾晉以來野史雜文流傳高士
遺節至於今時別其品第為一書以續玄晏之高乃
多散落未得彙古以今所見乃有吾吳獮山沈隱君
之事隱君清和而文曾為博士高足弟子名冠吳生
者三十率與菁山范太史方駕同業及太史貴而隱
君年四十矣乃始棄去而卜居獮子山之陽為終隱

計少任義養名好奇節嘗脫其父畦山公飛語之獄
縣令憚其名故不敢織已既隱而恬溫遺事自沈築
宅數間禾田桑地數十畝饘粥財足不事廢居息業
保耕婦炊屨不至空耳歲時伏臘自釀名酒擊鮮食
偏召里中父老子弟及平生居約故人晏飲言笑謔
呼為驩然不甚官偕貴人獨太史公得與太史公不
以貴踞廢素交之風也而又為東楊潁大人以成名
故遠數千里外聞吳孺山有隱君焉凡交太史無不
交隱君者而隱君持意孤峻一切為溟滓不絕迹而

游方之外雖與人為徒乎中飄飄不可測也先嘗無
子所子伯氏仲子已有子而仲子出舉偕計已仲子
舉而子為諸生又夭歿存孤孫三歲然隱君處通約
存亡之遇驟遷滲然無攖寧人以是知隱君天遊尊
生者以故今年六十矣顏如赤丹牙齒毛髮不變謂
有內養焉當懸弧曰太史倡遠近諸士大夫稱說徐
孺子之高義為隱君上壽各有篇章題其端曰孺陽
娛老余尾而進曰孺子生在南州去吳二千里遙以
一過名吾山是謂吳無人當以屬隱君且漢方盛薦

辟士多為刻節高其名賈徵已乃設為不就終隱以
堅其聲大氏矯翮耳非老氏守黑莊生爭席之義且
非力不食苦行也絕迹易無行地難此何當隱君哉
夫壽有三品太上靈氣合仙下者馳行而筋骨不速
盡厚於先天偉耳中者德充守真不與世營素隱恬
漠愉以善生此道之次高士之儔習之然而刻危不
如忘者遠矣今隱君棄名岩處塊然無情此老來安
期之流不當以孺子溷之雖然致詞為壽輒近豪貴
家習為名多腴隱君已惡名逃之安取詞為名哉予

第以積心喜傳高節乃隱君與家大人交亞太史而
近所聞同歲仲子前所謂隱君所子者更熟故因壽
而志以傳

校管子序

嘗觀太史公曰余讀管氏牧民山高乘馬輕重九府
等篇詳哉其言之也已而觀諸輕重所條米鹽俸屑
可醜如大駟良賈素封文守之家將唾不用奈何管
氏以傳此名乃知全書多雜大都類是夫管子伯圖
大要三事一曰法二曰財三曰兵法如四維四順雜

則為忘職必誅財如倉廩衣食乘焉雜則為腴削龍
斷兵如七法幼官雜則為設詐權以奇夫使管子蒙
詬萬世得罪儒家而曲臣詭士資口為邪則雜者過
也按管氏於春秋為齊良五伯十二侯賢大夫之首
敵以區區海東抗獎之齊起中衰大昏亂之末佐
外亡新定之公用其臣民三歲治定四歲教成五歲
兵出以三萬教士方行東西南北無抗三存亡國九
合冢君以衛周天子此非孜孜褊心之夫刻急小察
足用籠罩天下駕使羣后而莫訛議者謂其內政轉

後陰中陽外欺諸侯如至眩兒又以挾兵脅四國以
必從而變破師尚父古法率其國人盱衡奮臂衆走
於功名則大壞三代世風乃法家開焉故曰管仲之
器小不勉至王乃稱伯哉要以引經扶義束情後道
蓋過揚善終信於同盟其氣象雍容猶王者之遺焉
為相三十餘年外無欺隣詐敵內不施鉞大臣公姓
下不草艾箕歛編民而悠然伯如齊語所志內政軍
令具在即局隘不可以王亦豈如書所談三事乃至
急削以詐乎哉春秋凡變必書晉蒐書鄭竹刑書魯

丘甲書畝稅書向使管氏用此書以相變乃居三國
之首術乃商韓吳白乘孔之首長孔子何用顧以如
仁如仁津津揚之也大氏周衰道詘至于雒國而祖
伯賤王大甚天下有口游談長短之士都用社稷管
氏為大宗因自以其說系而附之以干時王獵世資
田齊之君又自以席桓公敬仲祖烈為竄勝誇一世
而存雒故其書雜者半為稷下大夫坐議浮談而半
乃韓非李斯法家輩穰商君以黨管氏遂以借名行
者也故其書有春秋後之文有戰國之文有秦先周

末之文其體立辯夫稽古者如市寶器于滇之王濱山之珠按名而索之少焉雜以燕石越璣而市者不識也則監正傍視而笑矣且其買者未必非所賣安名善賈哉孟子曰尚論古之人盡信書不如無書以周本世且不敢信其國志乃當秦炎散出所得奈何咕咕章句弗論乎故愚以列子晚出與莊子雜篇與管子皆多僞不可信自經言外內言十二外言十半短言區言十七襟蒸十九輕重金於僞矣又其解自尹知章初註蕪陋劉績所定復略徃徃多舛誤讀間

校而標之約十得五置其輕重篇第論庶其忠於管
氏

朱太復文集卷之二十三終

朱太復文集卷之二十四

五湖朱長春太復著

序

孝行圖說序

善乎太史公言之法者治之具而非致治清濁之原也明興承元之穢綱紀羯莠倫德瀆涕治亂用重極弊難反

高帝之世刑嚴如秋霜重獄動至數千人官府武健自完百姓累足惕息以待束

文帝嗣起壹稟家法以抹末濫當此之時法稱至肅
譚德者詘焉說者以 國家用殷正先罰後賞尊而
不親予讀

高皇帝約訓六條與

文皇帝領布孝順事實為善陰隲書起而歎曰微乎
哉聖人所用漸漬祝化起善於陰銷過於眇牖天下
底無刑如是乎然後知嚴法非以棄德威民約民而
之德也昔者興王嘗起桀虐之尾解網濡然與天下
休息其道順 國家張已弛之弦掃久翳之霧其民

便溺於椎結夷風恬化不恠此欲引而之道寧能一
懸象適鐸而聽者浣人滌垢而就染醫正治一反治
二二摠於一要有先後歸究齊耳太平二百餘年同
倫一俗士尚操行民急本實律比無有加深官司浸
寬而家戶自重脩禮遐塞委谷一有梟獍毒賊恣睢
不軌莠行里閭唾之刑隨其後非庶所謂盛際遺風
善人勝殘道德之效耶既琬既琢復歸於璞刑期無
刑善教入人治在彼不在此安云先罰任法或曰治
道若陰陽時極必反物盛則衰亢則害承乃制天之

運也今無藏法乎夫 國家繩武守文而理上無更
典下無嬗議咎在物力殷富流俗趨文靡巧匿詭相
高民淫溺而化湮不章世之季大然也已暮之駕急
策之馬有逸耳善者姑調而誘之乎

二祖訓書具在郡學博士安先生所取繪圖通說列
而刊布之其意出於此

御訓圖已行今擷孝行為二十類類有序有圖有演
有贊艷其事以歆世津津甚詳易曉睹古之象恥今
之溺九人所由翻然也昔上古結繩而治虞帝乃有

繪采象刑取震耀萬民之觀而觸以化之所為神道
與法遠矣故曰法制已然德化未然使民希為善之
利而耄幼相勸以移易陶鑄而不知也博士所頌政
興道流化輓人心而助培國家之運其功大可行
於天下故序而表之雖然文具是耳治與得半抑有
能脩舉漢法孝弟力田行脩之科與六藝相叅間一
徵辟薦行長者以風天下如鼓得枹所至響應此亦
祖宗故事其在秉政者條舉實行之嗚呼奈何徒見
此圖說諄諄者乎

大乘止觀序

昔有學相馬於九方氏者縣圖而矚之三幸馬之骨節權奇毛齒情性無不熟也合眼而見馬忽忽來者坐而籌上質中質下質無不合明日從觀桃林之野人取其一馬體相似也轡馬而試之九方之駕獨神少選而越百步若所謂馬眩也神非不傳不可傳可傳非神神不在傳又不在不傳故輪人以一斧之用揣千古之書為糟魄道有言乎哉孔子曰予欲無言老子曰知者不言此與佛氏所稱不二法門齊指予

獨惟止觀之教言義科條累幾十萬言便便不幾破
碎哉夫道不可名心不可物言多愈失不如默默故
太上頓而悟中次徐而待中士聞道若存若亡中人
以下不可以語上也然而遂棄之不恐故李耳騎牛
已西猶為關者傳經二篇仲尼列壇曰立七十二子
銀銀論洙泗之間夫儒者之譚聖以內入賢以外入
歸乃一耳佛氏一切以內包外故儒言心約佛言心
詳詳者未嘗不約彼法所謂為鈍根設者今千房萬
戶聚為一宮今主人坐堂上數之曲巷長廊間架畢

照客至不設賓次室而引之則眩以皇為寢穿竇為門矣彼慮夫以馬室眩者之為禪眩也故託其不可傳多方以為容容終非神以別其不神之為神命曰大乘要之覺不在此易曰過此以往未之或知莊子曰筌者所以在魚故禪以舍筏為解鳥取執筏以求河執之心命曰有有之心命曰眩眩法不如無法故曰不二盡矣或過于佛亂儒也予故無禪悅而序之詩耶予曰道一而已矣馬遷列六家班氏次九流贅名耳道無乎不在儒得其全諸家得其曲曲合而

復全故曰吾道一以貫之今其言止觀傳亦曰正心
文一止為正又曰惟精惟一先誠其意一止也精觀
也誠意意識入也謂詩乎非乎夫上德不德至人無
執植其基安其宅委衍徑術唯吾所出禪何邪焉抑
世所謂禪必出世滅緣塊然為淨土者除智以守空
者則宜乎其冰炭之矣是卷南嶽思大禪師說今江
右蜜藏師重演以長水馮太史開之為教主過烏程
目予慧而授之以難因為題如此

選杜詩序

海內習杜詩今特盛吳有鄭子王子特異其習也若不習也非世謂習也蓋兩子習十年餘矣而得余特起若旦暮然余蓋見鄭子所自抄杜詩序云其言曰道性情者詩之本古有詩無法今有法無詩因陳天下學杜詞家三病語截截有致也余讀而歎曰何其憂乎憤世之言也故曰吾明詩之本也詩安得無法今夫瘡者嘶者舌木者齒豁者唇缺者鼻斂者皆不可歌此皆失其元聲者也若以令神巧輔清喉童兒授之篇數不教以如亢如墜累累等法直張口而呼

嗚嗚則巷中里下頑兒婦女接手蹋足延聲相和之
曲不比而登于堂上也又不工者也詩安得無法吾
所謂法非沈約之法蓋詩在成周始盛而孔子刪二
代列國朝里雜唱歌什定篇三百其法始嚴蓋嘗曰
關雎樂而不淫哀而不傷樂哀情性也不淫不傷非
法何以得乎要以情性為主法為輔輔具而主善大
約歸之和乃可協焉自騷聲賦誦廟曲樂府歌謠長
短參差變方屈宋蘇李柏梁鄴中諸流未有遺法而
況至於律則音節諧和從風不舛法久益嚴自然之

勢也杜氏蓋備衆體而律為最其於詩蓋乃法家深文無害者我嘗訂其法有四非自杜始古法也四法者由性情設還為性情制不肖之夫賁起章甫之士脩容草莽之子夷率山林之客逍遙入朝極辯履險多危思婦悲唧逐臣恨飲別旅興致集讌增懷戚俗無容朋遊感義其於情也有理理不可禁其法在體聲過則厲調過則離情過則柔理過則贅太亢而比殺太宛而比慢太流而比濫太苦而比數豪心者蕩焉拘節者畜焉榮華之人麗焉靡靡者淫焉俗夫鄙

焉溺無制焉其於情也有僻僻不可任其法在格首
尾合以亭也骨脉通以至也節奏諧以中也布置當
以勻也不穠不枯不局不踰不方不歌不屬不離無
情而若有情至若不深其整若亂其高若平不言而
意存其於情也為綱合乃成方其法在章高如山下
如水清如風曠如天動如雲一質一文迭相為經小
大疏密不相奪倫如鍾磬聲中閑以平既閑有音一
言不可更一字易而不成聲其於情也為佐變化無
窮其法在句句合成章章合成格格合成體體合成

詩此法古法也而獨備杜甫當是時唐中葉衰天下
定復亂亂復安數四甫以介忠孤憤身丁盛衰多故
而又自初流迹吳落以至脫難赴主服官抗詞逋遷
奔走其家族弟妹妻兒散不相顧平生故交多零落
浮沈生死別離之思而親遭飢寒困頓免死偷安一
切寄之詩而感多思深畢其才於吟故其發情性至
真至變法亦稱焉此所云主立而輔具者哉甫性貞
志苦身擔古人之事以挽世興雅為務自言曰作者
寸心知曰晚節漸于詩律細律是法也細詳矣今取

其詩篇一一按前四法無不應性情者故可備式因
論其指夫衣者抒而為疋剪而為幅縫而合之緣而
飾之成而服之狼狽無異陳醜然使人裸而毀服被
褐之博立中朝則童子笑之矣故由前則無性情之
喻由後則無法之喻也詩安得無法鄭子明詩之本
也予以此言也示王子王子曰然故當兩行之因序
於後

山牕倡和小序

余詞社王子居在吳興北城外城北舊為項羽所起

吳中故址其門曰霸王門橋曰楚帝橋郡中地氣古
焉門外水自西南而來二百里出自天目即茗水也
合茗溪經龍溪盤青塘到此門折而北注則十五里
且為太湖其居正當折水之上水清交戶俯可以鑑
三面見山北矣山東毘山西北仁王山鳳凰山也西
康山近者一二里遠四五里南則道場諸山去城三
里而近亦往往雲氣通焉地之傍郭者自峴山外此
為滕王子又于居傍新築一室臨水對山號曰山牕
牕開則山山布如列棋者牕內惟一床積書數萬卷

連屋自其翁憶素廣文先生童所讀貯漸至今五十
餘年矣牕外有方池財二畝種蓮其中植稚竹其上
周包以塘挿木槿叢叢為籬前接高槐大可隱數十
牛其陰冒池池種魚大小數百頭出沒相狎主人曰
坐而臨餒焉竹中獨置一巨石平如席纔容四座則
王子飲所也然班荆草野不容貴介娛閒往還獨隣
舍田父濁酒畦蔬通焉外則予與東溪鄭子間從其
所遊仰望山下濯水池槐竹之間風陰陰以來古云
林日翳然令人有淒瀟之想此何下乎夫上者天遊

下者物遊金谷侈於聲伎蘭亭慕於絲竹吾謂皆不免物王子蓋得其中矣蕭然不飾不逾戶而遊足此所謂無天損哉人益亦如是耳且夫通塞外也戚喜內也世幸而為人人幸而有才才幸而通詩書善吟縱吾身之之與才之寄何所不樂安能以中之役役受外之云云哉王子曰然吾家翁仕烏傷且還七十矣以是為樂也然吾有廣心焉是室以慢世為寄如以吾他日得志亦且無增是矣是曰也王子倡余與鄭子和各為詩九篇相坐倚歌聲動一里里人指其

居曰樂哉王子善自遊者也

序與馬主一論文

北燕有馬主一特起雄毅倬竒之士也予往時未識其人見其文辭雖為舉子顧獨恢惋倡為高激聲語至駘宕自喜不肖和於丘里間時時入傳古諸先生或竊大咲僕獨心異之已余補千乘令主一先令古肥同屬濟南郡顧竟遠第獨遺書往來通一季間以古人事相期甚薦也辛卯八月以試士之役集而西人適為當事賓供直居同舍凡二十日日高坐無事

然後乃得肆意抵掌譚上下千載述作者之指究其
歸每遇當意相得甚驩主一輒恨相對晚以此狂騫
為娛連晝夜大要主一天性僻孤峻余稍調以飲和
其論辯主於瑰竒獨確援人以不及余間引以雅傳
之所著好擬玄經爾雅古文頗為稱說六藝博以大
塗其語先引今世知名之家按其伎倆推而等之漸
拾級而升諸古始先藉其美乃條其所不足次其品
定其同異束以六家之槩先欲去其采賡因緣靡曼
小巧傷道因推大權以要多而會於真必則古昔稱

先王主一初意擬一當當世大人成名見余所言迂闊先而駭卒以奮然嘆曰嗟乎人材古今豈大遠哉古人以沈酣厭飧而出今欲竊一嚮告飽非所生才自成才難士業棄筆不受書則已安能以賈人心廢居逐行販為市於文詞之場眩俗世乎為後無人乎蓋主一薦嗜古羞與黷冢儒伍其久憤積也今天下多耳視艷然見前二三君子葆得一世名則應臚而趨之或者之議曰言出如食耳人人美而甘之即聲擅天下亦何必上古古者多樸不說觀其法太拘人

以此是詩書為塵飯而孔顏為褐父也今士烏得取
功令程之乎夫高行不同塵達人取近名志士必
信古周衰游客橫議孟軻氏獨推三代漢武帝喜詞
人司馬相如為虛辭濫說太史遷持以質核杜甫見
大曆才子滌濫為新音嗤其名與身滅力輓而追古
當其生時三人之事如一牛毛不足勝天下天下之
名亦不振藉為易而投時豈不生享名高力亦少省
然要以至萬幸然後三子之功長豈與曩時驚眾虛
美表表譚得失哉主一志端而行芳性特氣貞少可

一世而好譚慷慨當日之務充其今日已在楊雄河
間之間其薦嗜又未可量豈難勉之至古乃龔伯雄
予望之矣已竣役予因見主一令時為諸生課文輒
已益往技化倬詭要以雅馴合道稍稍露其用世之
畧槩復喜過望文無小大其於雅實於經世古人以
此不朽是吾兩人所為期也故因所刻叙其交論始
末附以為之要

張先生厄文叙

將由夫刻節尚行之是中古以來士以文顯矣士不

以文則駕輿而說輻也將由夫飾詞先資之是顯者
無必文文者無必顯與漆佗際之豪傑多骨朽而言
傳豈不痛哉古今文家之厄者司馬遷不終於金馬
杜甫不中於應制浩然放於不才數君子文詞于今
豈不家戶津津在口顧當其時大誣品至後世始定
談者皆謂時命大謬此不其然市翼於冬不售市不
龜手於夏亦不售此則其左者也黃帝之樂張在咸
池之野此天下之至音魚而潛鳥而逝北宮子而默
默何哉雅無巧聽而知者少也甚矣正之難入也此

文運之厄非士之厄我朝以制義程士制義敷演
出註疏之遺氣不近古然亦有至不至有正不正第
恠博士家數以仕顯者成說相傳為螺祝肖貌此近
於皮相目食天下多有能言之士白首轆轤詎必都
不至不正者乎余所見里有張先生所為文大要皆
啜其英根於理脩詞三十季積累千萬言十有八出
於至九出於正往季嘉靖末文恭然濫矣先生以至
遺慶曆間士益務奇詞削棘爭巧先生又粹然正不
信也今已半老乃抑首摧眉與貲郎為伍誰知先生

文者此非先生命與夫制義乃一代之體隆衰亦與國俱言出土人而獻

天子有古太史氏採詩觀民風之遺意竒邪雅正治所在也獨奈何無有注意標正始為鳴矢坐使天下茅靡如張先生輩數斥而巧言破義自濫入竒今且將叛經左道以快意非文運大厄哉余雖以此時顯心獨恠不然流俗之滔滔今又悲張先生始知正道之難信乎文厄豈命哉張先生二子與余游好余父事先生知先生為人休儻任意有烈士風天性英毅

其才可當國秉向使非文困先生以其壯年氣力出
為國家任刀俎之用勲業可方張趙今消磨數十
年始小就一官又多文法之拘將使豪傑何效哉此
則尚文之過也先生為御史大夫莊僖公仲子莊僖
公名卿也予又曾聞莊僖公素奇先生風節謂當益
起其家故伯子既舉不以任次相授寧拒知抱經不
遇終乎夫文章有真知者自得即不知於今苟如遷
氏等必有後知者願仕宦限資以苦後人豈不命矣
夫命矣夫

序張樞南制舉文章

自余少時里有書淫之名然數不中於有司其補諸生稍遲家又貧也諸生竊笑不以我為賢所交獨張次君云兩人負好古氣每會抗顏而論千載之上自以為狂人亦號為狂至小小科目文詞猶嗒然羞為今之波也蓋歲丙子學使者里選兩人兩試兩不售最後得並收於直指大閱予時貧矣朝暮無以奉文母頗領握次君手謂曰吾不可以再誣三季受天損之難吾將易以適人子何如仲子曰吾惟吾志是事

余遂先仲子計偕又六年仲子再試不利而余以癸未薦太常為太史黃先生門人則其詞又變循其初益潤飾之取稱心懸解稍稍傳古以自喜今所行是也蓋張仲守十年故吾如此而余稍遷復焉已歸張仲見余而謀余為勞之乃曰仲而落羽十年矣義必無變恐顛白而齟齬於此土吾壯子不忍更強子雖然易我適人難以我適地易孔孟聖賢也五尺之車水流而不停此豈為栖栖哉章甫窮於越而貴於中原以子之才適上國必有識者何纍纍局局自苦為

乾瓜不食乎於是張仲聽吾計家無重貲盡脫其室中之粧又予等親故人助之乃得克其資入太學又一試落再試戊子乃舉亦黃先生人以是知余兩人趣業果同并以奇黃先生識人與余勸成善謀而壯仲子之守能堅也雖然余愧仲子矣秦越人適國輒變醫其神也夫惟聖人與世推移其次莫若守以待世夫知其玉卞氏三刑而不為更詞豈業欲好古而急信知乎余往日之議雖為親夫亦不耐貧而有賈之心哉士將觀志焉余愧仲子矣以仲子之事可以

事君可以任道可以挽世而起節故為仲子序其概
表於世不欲論其文辭恐俗人以吾為阿好而借自
譽雖然士亦有類仲大父莊僖公功名著於御史大
夫父河間別駕其次為寵嫺文九試不第昔予曾序
其厄言伯先舉季為余同舉進士今仲子能成別駕
之志殆叅焉吳中稱甲姓三世張士此莊僖之食報
仲子文習於父其堅節守正有祖風語曰闔王鼂采
霍珠夜光士亦有類信然仲子故名嘉諭字君俞故
時余刻會中厄言有其文天下知之矣第之歲毋夢

張星入於斗易今名

座師張理吾先生刻證義序

刻證義者閩海張理吾先生以其宦遊其廬居退食待次間試一二操筆為舉子文也用其卮辭和於先聖賢微言鋪糟茹精紬演緒義證嚮今古而借制詞以行故曰證義蓋其疏也先生為余鄉書座主先生故為名高才生薦起太學起家長安中往浙司衡者簡席其名借先生以毛詩家別校高堂之業故長春得進於先生先生今故鄣烏程之傍縣也先生舉士

人而長春與其經師王子由氏同貫烏程又長春獨
落太常歸故長春於諸弟中侍先生最久且薦先生
治故鄣倣太丘要以引經斲雕寬網以其身薦行以
化而性樸彊不受文法與脂常骯狗以結上官媚諸
賓客長春以久約頗頷不給生然而近縣數見口不
敢道私也曰請惟文事則語更僕則其僻好大要以
刊華見本悟象罔謝蹊徑期於古人百世旦暮知解
自是乃得承命立一言稍稱於世中賢達長者而以
捷矢報命張先生成施焉願長春狂也又出於山季

希進孤憤之氣中未調天均而外矜於鑽刻陵厲色澤以中皮相之目是言之言非無言之言猶二之耳今讀先生文而灑灑自失也先生證義一意取懸解如南華之演老氏不求章句破碎傳會往往離經生家口耳之故而

且為宋仲晦氏忠臣至於聲節點綴益不喜為流俗填箠附和固可與達者遇難為曲士道也先生自有道之言雖以鼓吹六經齊永天地不可以鉛槧目之夫天下莫肖於人之言也而繪象為小故屈原之辭憂深宋王之辭情麗子雲故

谿刻長卿特間易李白豪肆杜甫樸忠其性靈吐注
結不可變故曰誦其詩讀其書尚論古之人今先生
綰綬登仕十七八年跡不離於郡縣身不列于朝著
故郭勞苦清畱下歌休息而上不免於譴訛及移南
中炎毒之地貳報幾上厯厯遷一郡尉以去語曰工
雖善鑿非銛不入此言逢世取利也今先生之文豈
為銛之語乎哉好古道不習於媚諧世之人此足知
先生矣夫聞寶玉終遇知音間出今天下方超巧給
四方側除嫖佻之士紛以其不賞之軀獵躋華班廡

貴為前驅而立表日月空勞

主上督意吏治清率士風卒以罔效而使長者拙宦
如先生輩終氏眉骭驢馳驅攻苦以老不知其幾一
旦遇事將安得樸誠擔任古人風者付之此不慮乎
是何知遇之希哉吾誠懇矣昔有駕牛而適燕者車
重牛瘦日不百里中道而遇客曰不如馬之駛也舍
其車而還求馬馬至而車亡其說在變塞輕心之夫
每每以其實為之故子雲閉門草玄首白矣而著美
新之文儻亦求馬之意乎是何與長楊諷諫初志之

諫哉吾先生守一令十餘季而今其言愈薦自喜守
故吾既尉會稽吾過望先生而見其杜機聽其言察
其治行司故鄞時乃知先生真有道士其于楊子守
玄賢不肖何如故於其序證義也慷慨述而著之使
天下達者攬焉

朱太復文集卷之二十四終